

四庫全書

集部

欽定四庫全書

集部

山中集卷一至五

詳校官庶吉士

臣柳邁祺

總校官檢討

臣

何思鈞

校對官編修

臣

吳錫麒

謄錄監生

臣

陳

韶

山中集序

山中集者何集止山五君之詩也為之集者何門人所  
編梓也名山中者何君居武夷止止山時所著也夫五  
君崇安人也崇安為建之巖邑去邑二十餘里有武夷  
山止止山又武夷中之一山耳峯巒崑壑秀拔奇偉清  
溪曲流古迹宛在嘗聞山水高深則能開人之思泰人  
之神也昔朱子構仁知堂于大隱峯下取號晦菴謝人  
事養性真著書立言為世大儒君子謂其雖學力之到

而山川之助亦不可誣君自蚤歲雅好林泉日窮登眺  
緣崖捫蘿攜竒擷勝乃結菴于止止山中日以種學績  
文為事暇則耕山釣水彈琴鼓缶或暢於吟詠之間或  
發於詞論之下日稔成帙凡數十餘卷門人偶得此而  
刻之特其禁轡耳就其中觀之有賦有此有興有古體  
有近體有樂府類雖體製不一意味各殊要之力追古  
作務去陳言以求合乎聖賢立言之旨則未始不同也  
非有得於瓌竒清秀之氣超然於塵物之表者不能至

此所謂山川之助非邪雖然文以潤身政乃及物所貴乎吾儒者體用之全也昔晦菴嘗作山間詩胡五峯少其有體無用今止山詩文清新簡古一本於所養發之皆所謂有體者即今小驅仕路嚮用明時尚以其發之言者而措之事業致君澤民不負所養使世之觀是集者快然指曰山中出雲雨太虛一洗塵埃山更好其有體有用也如此顧不韙與然則師之所以為教弟子之所以為學亦不外此而他求矣若曰文字乃終南之捷

徑止山耻之予亦耻之是為序嘉靖丁未歲秋七月望  
賜進士出身戶部署員外郎桂林馮承芳書

欽定四庫全書

山中集卷一

明 邱雲霄 撰

四言

有嚴

遷泮落成也

有嚴新宮維南孔暘獻列且郁如受如將崇川秩秩獻  
河沆沆儼其有臨重門鏘鏘侯輩斯立載憬載翔張其  
左翼煥其有堂

金匱要略卷一  
巖巖黃石實崇之鎮白華嶠嶠如猊如狻延岡自西若  
伏若奔既景乃正維鎮之馮協曰遷止謀並神人

天啓明運昌文肇始孔道烈烈萬有斯世神既安止靈  
斯萃止孔牖我人遐不淑止日斯月斯執敬亶亶維聖  
克憲罔有終悔

維泮有芹采其美矣君子至之德音彌彌維君子朋瑯  
瑯濟濟母徑其衷母戾其止造成曰敏帝庸曰命已德  
維明允嗣徽聲



都都雲士各共爾珍光我有邦維國之禎絡如征如宜  
君宜民克敬有終乃維厥成則篤斯慶山川之榮

嗟嗟我友毋言我窮用告厥衷敢不執恭維人克敬維  
帝寔聽天人之合丕承有躬載錫斯祐永終有融

宮牆翼翼聖模孔赫載具爾瞻實民是則義路其回禮  
門有秩修徇厥儀敦茂爾質表茲邦人罔不敕敕

卜用剛只乃蠲其陳合敬維一有士如林式禮有恪周  
旋降升曰祀孔明既燕既寧樂具和止爰落厥成

有嚴八章六章章十句二章章十二句

乘黃

詠圖壽何古叟也

我聞有昔皇運其昌維王修政輿服孔章氤氲聿胎肇  
化厥祥曰狐斯非乃麟是方載鯨其角爰在厥肩奇肌  
象武顯仁用剛嗟嗟古叟侯德維臧文以敷化武以遏  
强帝錫元功義聞攸芳維盾維賢世德用張曰國之楨  
申錫斯皇慶筵具止樂奏有鏘爰歌孔碩其風則長嘉  
樂君子吁嗟乘黃

乘黃一章章二十八句

惟車

廣小什也

惟車有輔周道康兮維檣有筥濟江長兮顧輔不設中  
坎坎兮載沈載浮懷漾漾兮

瞻彼林躅飽將棄餘縣蠻之止舉斯戒危嗟嗟撲滿顯  
竅以入如車有籜隆然張蔽

百爾君子視典章兮皇祖有赫貽憲昌兮毋謂不知抑  
若揚兮毋苟女比衆且狂兮

直言孔武織言如組維彼克佞如攜如取維此貞人迸  
言如毒昊天震怒云胡以懼衆口鑠金胡不斯畏

母云爾功功有所由成母云爾才才有所由名匪幽不  
克上下胥征庶邦卒疹孰哀我員

誰謂坤廣云不可往誰謂砥平足縮縮其有行戒哉我  
友駕言孔躋毋爾斯馳執敬反反

夕斯永矣我是用悲續續揔揔百憂以集日之昃矣旦  
其莫矣大車斯轟塵將及矣今者若褒行謂筮矣

天有所短無昏不旦地有所病無陂不平直茲孔畏青  
豈在人悠悠我宰爰瘁厥倫君子敬止不念有生

惟車八章五章章八句三章章十句

停雲

書所懷也

停雲初濟曰維在南彼美懷人實民所瞻詭隨不克正  
直是肩胡斯違斯謂時則然駕言騑騑云邁芝田

停雲在南瞻望有長彼美人兮我心孔傷翼翼其猷蔚  
蔚其章有邦之則下民之將胡斯違斯不念帝疆

停雲其靄載張如蓋嗟我有懷言車云邁衆異厥趨我心不改批既收之胡不揚稗中心醜之而謂我怪

瞻彼雲兮傾而揚兮我之懷兮胡斯去之鑑不蔽螭衡胡以欺汝罔不忌胡此之忌

悠悠有懷靡我思長怛彼流泉不平不坎人云則是疇謂其罔嗟彼覺人逝焉斯往

瞻彼四方我心殷殷彼其之子亦哲且崇厥由如弓好憎如輪顧遠胥軌疇馳不從

梧桐華只飄風聿至昔斯芳斯鬱其有比玄鴻矯矯黃  
羽喈喈音其可懷矣冥不可致矣

我心則鑑不可以自瑩我心則度不可以自均言不克  
晦青將女從維江有芷維林有芎佩斯服斯爰永厥齡  
停雲八章四章章八句四章章十句

卿雲

書所見也

卿雲英英出自方東綢繆之組昭回有融君曰自帝臣  
曰自君上下攸格無微不通正直維弼詭隨無容庶邦

之慶萬姓之禎

卿雲麗麗東方自出  
韜其有長橋如鳳翼  
天不愛寶維帝成之  
下民徂飢我是用刺  
璫璫天章而莫可食

卿雲皇皇瞻言在南  
載機載杼天孫之將  
絢其綵矣在天之網  
望不可即胡莫以裳

卿雲其蔚載瞻其瑞  
緬彼有懷我心如縷  
下民孔艱槁其穡事  
維雲變態卷舒朝莫  
載發其祥好風好雨  
今者之兆來者之惠



卿雲四章一章章八句一章章十句二章章十二句

芄芄斯蕨

壽馮司徒郎也

有叙

翁壽山人無以為獻獻甘蔗十株夫十全數也而百而千十之積也故用十焉惟君子德樂道於人口厥味似之惟君子養粹面盎背厥色似之惟君子澤下究無方厥用似之惟君子壽茂次以升厥節似之因歌芄芄斯蕨四章用侑觴

焉

芄芄斯蕨有旨且甘彼美君子洵修孔揚膾炙我人嗜服不忘敬哉昭事爰錫無疆

芄芄斯蕨實紅實紫彼美君子顏其渥赭頤厥天和中心達若令儀孔淑爾介爾祉

芄芄斯蕨民用需只彼美君子爰究厥澤侯施斯溥疇民不宅維民動天維天無斃

芄芄斯蕨節言次升彼美君子斯邁斯征以介期老孔

茂厥齡如川之逝遐進不盈

芄芄斯蕨八章章八句

山有泉

贈友也

山有泉芄于其陰君子樂胥言濯其纓優之游之逝耽  
爾清逝耽爾清以卒斯盟

山有泉芄于其腹君子樂胥載濯我足我心孔契嗜此  
幽獸嗜此幽獸伊誰云告

山有泉芄于其趾君子樂胥言盥其耳無塵有聰我心

則喜逝彼頽流載憂靡靡

山有泉淙于其門君子樂胥言洗其心有鬱中林杜彼  
俗轅從我攸好永以相敦

山有泉四章章八句

嗟嗟

詠屈平也

嗟嗟貴戚顧義瞿瞿忠不見售憂心如旒彼昏既酣進  
讒如醵舍此蘭茝佩彼蒿蓁寧汨清流爰喪我軀翼翼  
宗廟忍見丘墟

嗟嗟一章章十二句

赫赫

詠留侯也

赫赫留侯萬夫之特博浪之椎豫讓之節依漢滅秦厥忠乃烈抱貞不渝藏用于默殫心劉庭為韓報德

赫赫一章章十句

有燧

詠靖節也

有燧黃花味同隱逸爰賦歸來載飲以適五斗非輕萬鍾不益君臣義明我心匪石

有燧一章章八句

龍卧

詠武侯也

龍卧南陽與世相忘風雲三顧矯然翱翔鼎勢已成既  
明且將義不兩立我武用張鞠躬盡瘁賡志揚揚

龍卧一章章十句

有鵲

誌來巢也

有鵲喈喈巢我庭樹綢之繆之亦孔斯固占彼天風有  
比其户于焉宿宿于焉响响

惟枝翹翹惟風飄搖爰集所止並坐其樛聿彼鳩鳥毋  
窺我有人各其能汝心孔醜

豈無他林亦有芳枝或往或來不如子忘機惟丘有隅  
黃鳥止之相彼海翁白鷗下之

惟鵲有靈載卜其聲爰啄我屋懷彼好音禍福有媒敢  
不敬躬惟爾之鳴實省我心

有鵲四章章八句

山中集卷一



欽定四庫全書

山中集卷二

明 邱雲霄 撰

元旦奉制早候朝賀

風迴鼓角動春晴天入樓臺瑞靄生  
蚪漏聲寒遲五夜  
龍墀星影轉孤城紅雲冉冉開仙仗  
紫極亭亭仰聖明  
草莽喜逢堯舜日空懷淺薄負昇平

山中

節堂客去山逾靜  
花逕雲開水自流  
昌歆石邊靈節長  
伏苓松下暗絲浮  
仙人時見騎黃鶴  
野老長眠傍白鷗  
懶向叅同問玄圃  
應知閔處即丹丘

送人歸鄉溪

愛汝尚年少清才羨老成  
青宵檠獨冷白日劍長鳴  
歸夢連雲遠離愁逐雨生  
含香梅尚蕊笑折贈君行

簡黃新泉求竹栽

長抱山林癖何因避俗譁  
有牕堪種竹無地可移家  
傳

本分香雨移根動翠霞紅塵飛不斷草榻借深遮

送袁少府報政

二首

二月輕寒薦客衣東風吹雨上征旂一川煙草迷行騎  
萬里春帆共落暉卧月頻牽南國夢看雲時采北山薇  
九重聲佩迎天仗午夜郎星照瑣闥

遊煙郭外牽晴綠折柳江頭帶雨青黃鳥初飛歸越客  
彩雲深處是燕京庭閒月色疎松落夢遶關河短劍橫  
朝罷丹墀輸隱瘼休言青簡滯儒生

病起 二首

青山無負謝玄暉  
病入新年藥力微  
睡起不知春早晚  
桃花飛後柳花飛

東風無力上簾鉤  
獨倚簷暉曝短裘  
草滿閒堦無客到  
白雲長為碧山留

奉陪侍御章介庵先生遊武夷夜宿冲佑觀

幾片紅桃亂水潯  
仙源窈窕翠雲陰  
花迎玉節低垂澗  
鳥避青驄遠度林  
岩草洞芝三月暮  
孤松獨鶴百年心

相看浮世空悲梗  
話入雙燈夜雨深

賦得

青編白酒養疎慵  
山逐雲深第幾重  
獻賦夢無金馬詔  
知心許有玉龍筇  
刻痕驗長看新竹  
掃翠留陰卧老松  
機事久忘能自信  
案頭長有野禽蹤

莫春陪沈拾遺汎舟九曲

登臨獨愛謝玄暉  
風雅千年杜拾遺  
蓬島夜篝驚夢寐  
舞雩春服愧追隨  
斷雲飛鳥相持落  
曲水層峯兩競奇

廊廟江湖成異感可堪蘭棹晚還移

送虞方山之京師

碧雨生春樹青雲接帝臺深慚袁炳遇獨愛伯生才秀  
淑開南嶽文章動北台年來長送客燕望重徘徊

送于成弟之掾松溪

柳色散晴煙江花媚客船春鴻鳴不斷池草夢長縣詩  
禮傳先業蕭曹看女賢長安多路達天闊漫騰騫

周仰峯主政訪武夷別日詩以送之

二首

丹壑幽棲祇自慵。白雲深處笑相逢。風高律調愁春鳥。  
波照旌旄駭卧龍。攜月漫從周茂叔。朋舟應愧郭林宗。  
金臺翠谷驚離夢。玉女峯寒望汝容。

滿林紅雨抱春愁。幾卷青編共此丘。綠鷁溪頭新使節。  
綠楊磯畔舊漁鈎。對君空有江湖夢。清世元無鳳鳥憂。  
北去相逢如有問。休言深澤見羊裘。

登天遊觀同沈少泉給事

風流最愛沈休文。結束相攀入碧雲。霞磴高懸仙島迴。

金定四庫全書  
卷二  
星槎直汎玉河濱  
蚪松落翠春長靜  
鳳管生寒日欲曛  
已向浮生了機事  
岩花溪鳥笑相羣

睡起

流鶯叫晴鳩叫雨  
山中不斷山禽語  
睡起開門復閉門  
落花落盡春歸去

劉吳二子過訪留莫酌時  
天高氣清河流月滿而  
飲興方豪復取酒進舟  
九曲

沙白月在地林深葉暗  
蹊山隨溪共轉峯與句爭  
奇魚



躍天樞動江空斗漢垂歸來何處鶴翻露下松枝

和櫂歌

十首

溪縈九曲鎖玄關山擁千峯密似盤漫憶紫陽歸去後  
一川風月要人看

一曲清歌解木蘭水光搖動萬山寒幔亭舞罷秋臺燕  
野月溪雲空漢壇

二曲嬌峯雲水間淡粧低壓碧雲鬟玉容不改春愁重  
粧鏡臺空舞翠鸞

三曲虹橋最上頭  
三杯石外望仙舟  
莫疑漢使河源路  
信有浮槎到女牛

四曲丹崖紫洞奇  
玉函仙蛻記秦時  
一從聽斷金鷄曉  
花落空潭春自遲

五曲花開錦繡屏  
青山無語靜儀刑  
樓前盡日東流水  
獨立蒼茫晚對亭

六曲中流石竈寒  
茶煙香濕紫苔斑  
仙人飲罷留空鼎  
拍掌岩頭去不還

七曲峯頭松桂深  
北廊岩下水雲沈  
玄猿白鶴聞清怨  
久伴危冠合脫簪

八曲城高紫氣浮  
夜深仙樂響山頭  
到來鐘鼓皆成石  
悵倚斜暉望玉樓

九曲逶迤引市廛  
人間天上別風煙  
青蓑黃犢歸來晚  
疑是桃源學種田

夏日田家雜興

三首

曉日空林生紫煙  
微風新長半池蓮  
人疑秦谷時通棹

俗近幽風只受田開逕逐門回石磴傍厨鑿井動山泉  
白雲一卧青山晚夢落桑臯向遠天

柳外鶯聲度翠微輕裁白苧試新衣深山歲月憑開落  
浮世犁蓑無是非江色淨涵林氣薄雨光留濕石苔肥  
青藜何處歸來晚滿地月明烏鵲飛

踈篁籜落時驚犬腐草光生欲化螢斷雨冥冥過壠去  
亂流脉脉向田分空齋有夢來蝴蝶荒逕無人下鹿羣  
長願桑麻輸早稅未應畎畝便忘君

牕前種瓜數本采竹構棚引閣其蔓且以蔽夏

露引藤鬚蔓雲分葉掌垂碧光流小簟寒色上踈籬得  
月偏宜晚開花不厭遲赤鳥飛滿屋巾服未曾知

遊超峯

獨宿孤峯頂高霞伴客遊花深藏石磴雲濕洗山樓鐘  
散千村曉林涵六月秋不知塵世外何處是瀛洲

過杜清碧讀書處

徵君何事隱崔嵬亂世冠裳共草萊碧嶂清江愁暮雨

寒花落葉滂荒臺石几半留苔欲沒庭松已老鶴還來  
白雲不斷空流水芳桂叢深春鳥哀

陷石堂

五月山遊興每遲桃花開遍武陵蹊路當古木連雲合  
石上長蘿半雨垂斜引玉橋回碧洞漫尋瑤草到踈籬  
丹青古殿悲寥落佛日無光壁蘚滋

夜宿天遊用鄭少谷韻

隱屏日薄孤亭晚風急濤聲起翠林雲濕萬峯寒錯落

月明長壑獨馮臨  
山中歲候青鞋老  
天上樓臺紫霧深  
幾度武陵迷路客  
桃花流水亂春潯

奉寄方崇陵憲副

獨上孤城意若何  
夢隨雙鶴度煙蘿  
崇陵第宅青楓外  
毛塢圖書翠竹多  
雲谷無人騎馬到  
天涯何處斷鴻過  
山中頗願無堪贈  
惟有清池長芰荷

草堂

茆屋交林霽秋齋  
坐夕曛短塙分樹  
色落葉避鷄羣門

設頻棲雀簷虛長宿雲丹砂思葛老青簡負明君

送華生歸富春

八月涼風吹桂花天南遊子憶還家富春潮轉漁磯近  
分水雲連鳥道斜雪暗寒齋憐獨夢斗橫深夜倚歸楂  
古來勲業多年少好為清時惜物華

石泉山中

寒風振疎林山中霰如豆睡起開竹房石泉動春候

山中雪



朔風卷寒雲空山雪深尺日莫啓柴荆獨見尋梅跡

聞簫

有客乘白雲引簫坐空翠吹罷竟不言背人度山去

寫適

酌酒月為伴開門山近人白雲湛江色碧草弄湖春

除夕

浮生荏苒年光盡舊業淒涼壯志違醉裏自憐傷古調  
燈前兒舞試新衣千家爆竹城闌莫一筋柔蔬酒力微

白髮總能知歲改  
青山依舊對柴扉

山中集卷二

欽定四庫全書

山中集卷三

明 邱雲霄 撰

春日

獨立孤臺感歲時，羞將短髮弄朝曦。  
門垂柳眼窺春早，堂款山容坐午遲。  
醉共青蔬貧亦好，夢騎白鶴笑還疑。  
尊前細把梅花看，冷淡香心只自知。

病中李傅竹見過走謝兼以送別

一春長卧獨柴扉  
門外深苔印屐肥  
花逕未勞題鳳去  
竹牕空自聽鶯啼  
帆依返照江鷗下  
秋薄寒雲塞鴈歸  
九曲風煙如有問  
紫陽樓外草庵稀

寄藍石橋

九曲溪頭舊結隣  
鶯花遙度石橋春  
孤槎有客時通漢  
深谷無人更問秦  
遠托江湖憂永夜  
虛生貧賤媿同辰  
青芝白石聊堪煮  
懶向長沮一問津

寄藍三十六吾原

吾原煙樹暗幽蹊倚石看雲意每遲月滿夜懸徐氏榻  
草深春夢謝家池莫將白日閒丘壑轉使青山弔杖藜  
離索不堪成獨立愁聽鶯語到花枝

有懷藍雙澗池亭因寄

習池春早憶重遊畫舫清宵月滿鉤疎竹小橋紅日薄  
南山孤閣翠煙流落花雙澗流還合野鴨春塘迴自由  
客到暗知仙格長人間何處問丹丘

贈林方巖

南服三山秀方巖一世豪風流凌晉魏詞藻數莊騷夜  
氣窺龍劒春林拾鳳毛憐君懷白璧猶自滯青袍

遊瑞巖寺

白髮從渠長青藜足漫遊鳥啼山寺出風靜木蘭抽曉  
逕雲初起春山水自流禪心何處覓明月一潭幽

登白塔

白塔開雄鎮清風入壯遊山光搖建水煙景俯汀州猿  
嘯千年樹人來五月裘受聞天上語更上竹間樓

草堂即事

曲徑妨高蓋空庭足遠岑鶯花自春候城郭此山林結  
竹聊垂屏孤音且罷琴白雲隨去住碧草共期襟

寄楊道人

一去山中久長念山中客幽想發雲霞何時生羽翮夢  
游天宇清坐惜林月白新筍應已抽翠簞添幾百

哭蹟山主政

共醉高樓聽渭城每依天末望神京東吳雅度歸公瑾

西漢清才數賈生直以憂勤書短疏肯將簪弁逐浮名  
亦知晝夜通玄運猶自臨風寄哭聲

酬雷半牕畫止山草堂見贈

十里江山二尺圖茅堂春靜傍高梧九溪流水浮庭際  
萬丈孤峯下坐隅雲捲山楹寒欲濕風移野艇勢堪呼  
幾回點易攜丹硯欲向松梢滴露珠

袁佩蘭明府赴夏桂翁柱國之招過山中病送以

詩



三十六峯秋氣橫  
九溪深處釣舫鳴  
夜驚列宿連丹嶠  
雲帶雙鳬度赤城  
鐘鼎文章傳柱國  
風流松菊愛淵明  
茂陵有賦憐多病  
空想寒輝照玉衡

荅范涪洲傷春見寄兼約賞牡丹

閉門春事已闌珊  
獨坐茆齋雨意寒  
碧草漫愁迎著屐  
青山相笑嬾彈冠  
浮名久信游雲薄  
短髻空悲入鏡看  
老態不妨姚魏妬  
願從歌舞到花欄

酬范涪洲餞飲牡丹臺

花氣春庭合芳尊別意遲談深愁轉劇酒滿分難辭白  
日情交惜清時鬢已絲未須論出處勉共白雲期

寄趙南特監丞

聚散悲萍梗功名羨鼎鐘高雲鴻影落疎葉露華重  
慷慨遊燕趙文章重辟雍黃金臺上醉何日得相從

送程少山應貢之京師

雨深溪上柳條新春到江南草未勻祇恐斷雲隨宦遠  
莫辭落日勸杯頻中原有道求麟鳳前席無心問鬼神

不信清時重年少商衡元是老耕莘

送傅丁戌遊楚

二首

五嶽尋仙醉幔亭一尊山雨照人青  
岳陽樓上多明月總寄相思滿洞庭

何處翩然散髮翁朝從南海莫湘東  
十年江漢歸來晚更上衡山弔祝融

中秋夜坐

二首

竹樽無酒滌深愁石鼎烹茶泛淺甌  
却恨千門同此夕

不緣雙髻易悲秋

玉鉤不動遲紅篆  
銀漢無聲度素娥  
露傍山城寒漏落  
空庭試問夜如何

酬雷子十四日見招

喜近中秋飲慙當上客  
星池開平榻白竹直落簷  
青得句留山雨敲牆過  
瓦瓶移尊臨露草浮世感風萍

再遊虎踞巖

為問煙霞客重來  
霄漢頭寒花低覆  
逕疎竹半遮樓藥

白雲春晚丹臺月檻秋天河通石井夜夜飲牽牛

寄挽汪泉翁中丞

曾看竹馬聚兒童空想登龍有路通南國甘棠公甌去  
中原禮樂孔明終白泉自照青山色黃鶴空聞玉遂風  
炎瘴只今歸帝德伏波不數漢時功

送馬鍾陽太守之任姑孰

停車且盡故人觴滿樹秋雲去路長粉署遠持新畫戟  
玉麟不似舊銅章風牽雙旆明江左夜見三台近帝傍

馬首陽春隨處滿將因繫纜問甘棠

哭程霞峯

昔年曾上此峯遊萬丈丹崖紫氣浮今日重來此峯下  
滿天蒼狗白楊秋才忌禰平憐欲殺貧慙敬仲早相投  
堂前鵬去空留賦好為遺篇子細收

寄乾菊與雷半牕

秋山細菊初含蕊漫采歸來露滿擎翡翠漸翻金鼎落  
龍團愁闌玉甌明老能夜讀尋行細興薄秋懷得句清

直擬野蕘持贈重半牕風月試吟覓

送楊華山會試

伏枕深秋日故人何處來長卿愁裏賦師道帝前才馬  
首南關近龍阿北斗開相思梁月滿空有夜登臺

九日病起

起眠得食日過午載酒登高何處郎試問籬花發未發  
秋風昨夜含青芳陶翁歸去已千載龍山醉罷春苔蒼  
漫把風流向此日空令異世成悲傷浮名於我竟何有

金天曰卷之三  
把鏡茫然一搔首江頭流水濯扶桑門前落日垂楊柳  
安得三萬六千辰日日看花長對酒

送錢贊府入覲

為政風流錢仲文藥欄長種讀書芸武夷合有神仙吏  
校理終歸館閣羣鵲鵲灘迴秋水淨鳳凰臺望彩雲分  
三年躍馬朝天去春暖鶯聲及早聞

送劉少府述職

北極晴雲捧禁闈南荒征蓋望神畿河橋紅樹侵霜滿



山郭青棠著雨肥江口潮聲驚客夢天涯春色覲臣歸  
曉傳五鳳雲中詔早放雙鳬海上飛

寄贈李少峯

慎

黃晚峯

森

應春試

雙劍光長犯斗牛五雲遙捧鳳凰州南關一笑投繻早  
北闕重華側席秋客旅驚逢黃憲日仙蹤遙望李膺舟  
明光春色傳呼處瑞靄氛氲仗外浮

送張南疇遷教瀧水

清世才名衆所聞黃麻遙帶御香氛騫騰終信心能壯

骭髀空悲髮已分  
幾樹秋風孤劍外  
一樽斜日九溪濱  
明朝故國青山出  
愁見關南馬首雲

哭藍汝汲汝文二昆弟

紫荊臺上罷埴簾  
元季風流世所稀  
青簡滿牀螢火散  
藍原落日子規啼  
池塘草長誰春夢  
花萼樓空自夕暉  
望斷幔亭仙已遠  
月明雙鶴夜來歸

再哭吾原

聖世應看鳳鳥飛  
賢聲早重帝王畿  
空琴風滿松滋治

楚緋雲愁薤露晞重到一丘懸榻在空懷千古寸心違  
寒煙細草年年長白壁青山夜夜輝

往時吾原結草菴于藍石之巔嘗同

信宿相期曰當特設一榻以待吾兄銘之曰一丘榻示不敢泛也既別乃贈以詩有云一丘亦與子同分千古相看友道存茲悵芝容於莫覲追風咏之在耳能不悲夫嗚然成咏

### 山居書事

一夜狂風吹柏樹錦林飄盡玉無數夢回疎影半斜牕  
月明悞有梅花句

### 贈九溪釣父

罷釣蓬頭倒瓦瓶  
白鷗長共卧前汀  
月明起看夜初靜  
三十六峯江上青

寄鄭雲巖

最愛風流鄭守愚  
孤高元不染塵淤  
風前綠酒能歌舞  
巖畔白雲同卷舒

簡友人酌

獨坐青山共寂寥  
一簾疎雨上芭蕉  
牀頭舊有封泥甕  
溪口還來雙石橋

治先塋有作

冉冉臘垂盡  
依依山澗中  
夜臺雲掩映  
霜逕葉併蒙  
寸草三春短  
高岡萬木豐  
斜陽空陟岵  
染淚滿丹楓

山中集卷三

欽定四庫全書

山中集卷四

明 邱雲霄 撰

酬藍茶仙先春見寄

靈雨開仙圃春風長玉芽摘來旗葉捲封處墨題斜品  
落龍團翠香翻蠨眼花欲移三徑地從此遍栽茶

再到石泉

斜磴臨高樹孤峯倚上天舊遊今日到重憶十年前竹

碎林間月花分石底泉生公歸去後法雨暗松煙

潘浮疇明府解印綬去歸羅浮山中作邀月樓伏

龍苑于雙湖之陽作此寄簡

仙人本自好樓居勾漏歸來髮懶梳開苑伏龍丹鼎靜  
栽松巢鶴翠堂虛藤蓑蕉笠雙湖釣水月山雲萬卷書  
寄語東山高卧處蒼生消息近何如

春江煙景贈高惟德

美人結屋春江曲朝見濯纓莫濯足寒煙斷靄春模糊



曉樹晴莎浮遠綠昔年曾汎春江查美人自惜顏如花  
今日重來春江上花枝帶雨春風斜浮生荏苒如朝莫  
慎爾栖遲便長去好從春水學操舟明時攜女濟川路  
劉子因春漲得枯根奇絕若赤蚪然持以見贈謝

答十二韻

雷雨交冥晦山川起蟄藏九溪春慘淡萬壑夜微茫閃  
電流空赤腥濤裂地黃靈含盤錯久神變朽枯光劉累  
真能擾支離術已荒珍遺輕珮玖瑞愛擬鸞凰度水朝

魚鱉開門避犬羊性馴依翠袖心侈謫寒堂卧抱驪珠  
月閒蒙獸錦章氣噓蒸莫靄精聚守純陽奮翼滄溟迴  
呼雲棟宇涼商霖吾豈敢長乘白雲鄉

送鄧合溪先生歸桂陽二十韻

衡嶽開南鎮郴江動北源溪山元蘊淑人物仰孤騫霧  
豹非林鹿風鵬變海鯤雄才歸賈誼落第惜劉蕡攬轡  
追前哲趨庭淑後昆談經毛氏屈薄祿鄭虔尊北斗瞻  
依共春風笑語溫道方羣小愠義重士林敦珉璧誰能

辯行藏未易論江流寒見底秋月夜無痕坐嬾牕前草  
愁深夢裏望雲歸楚國立雪憶程門潦倒悲長缺恩  
知列厚坤暗投皆按劍無計欲攀轅古道荒葦長蘋波  
裂地奔鴻飛高燕雀蠅污比蛛蛭江樹浮南國離花滿  
故園青山期謝眺古榻候陳蕃五柳清風在三槐綠蔭  
繁臨岐空有淚惜別每驚魂鴈落三湘莫書傳九曲原  
莫辭深淺酌不盡古今言

題彭氏百鴈圖

彭君好古有真癖手藏墨妙稱無敵良工三昧奪天巧  
點綴羣飛向蘆荻呼童攜軸山中來遠索詩篇拜長揖  
老眼摩挲看古圖滿堂秋氣侵苔壁隱約溪山半有無  
淡煙疎靄秋模糊斜陽寒影亂汀汜微風落日遙相呼  
衡陽山前風雨晦湘潭雲動玻璃碎長天浩渺任縱橫  
回首乾坤非紫塞羣飛隊宿無常踪行分序列如征戎  
蹴波浴破一江碧振羽起來雙掌紅洞庭木落波光發  
八月九月蘆花風江南此時稻粱熟毛羽秋來初整肅

日曛沙軟靜聯拳驚奴駭叫叢邊出有時側目自疑羣  
亂起高空斷翠雲縱教繒繳不相及世人虛有雕籠文  
君不見昔日上林一書札遙傳壯士餐胡雪黃雲萬里  
塞臣歸漢家天子尊如月又不見秦時商嶺紫芝翁霞  
宿雲棲宇宙空始皇徒有網羅密當年能復想冥鴻忠  
臣高士今已死耿光猶自照青史慷慨長歌意轉悲披  
圖感激空懷古

送彭石堂之京師

尊酒千山野照殘孤雲萬里是長安空同北出青霄近  
宮殿南開紫氣團壁水春深燕月迴錦帆夢落楚雲寒  
空悲岐路無堪贈采采秋風紉玉蘭

送范涪州北上

石泉燈火共高樓關塞風煙愴別愁貧賤每憐原氏病  
江湖久屬范郎憂雲縣鳳闕雙樓外月滿漁舟九曲頭  
萬里西風頻北望桂香消息帝城秋

奉陪顧願齋憲副燕金氏鸚鵡堂

顧君天下士高誼古人同  
嶽降諸閩秀文驚一代雄  
香散荷風細巡傳栢葉濃  
堂幽轉鸚鵡獻賦媿名公

訓劉白雲五月登大王峯絕頂得仙橘數十顆見  
遺歌其事異之

孤峯萬丈摩青空縣猿飛鳥愁力窮丹崖翠壁擁蓬島  
白雲紫霧相幘幘花開花落非人世巖頭五月垂橘紅  
世人俗眼不得見况能顆落歸懷中朱囊碧蒂醉香露  
瓊肌玉液搖春風洞庭霜後不足數蓬萊殿上空筠籠

偷桃曾傳漢方朔  
歲星左謫為臣工  
攀登直是有仙骨  
却憐野老非方瞳  
我今既已食仙實  
刀圭入口能成功  
竹冠蘭佩衣薜荔  
鞭雲策霧騎長虹  
與君再到此峯頂  
弄攜日月如磨礱  
為問子騫去何許  
星臺煙鼎寒青葱  
覺來天地同生死  
空憐散髮探鴻濛  
君不見幔亭歌罷  
此山下曾孫幾世  
成老翁

靈壽歌

野人高卧神仙窟  
夜半南星爛水國  
蟾蜍光射白雲開



有客踏花山逕沒攜軸虛章借彩毫被絃入管格調高  
幽人冰骨照人彩半百風花鬢綠毛山中蕓英今幾葉  
石上菖陽盡九節手栽松樹盡生苓夢落清風醉明月  
蟠桃初熟如金黃龍唇鳳翼清琳琅倚霞椿樹三萬丈  
舞衣輕拂珊瑚香風靜玉鈎簾半揭白鶴登堂來拜客  
仙童妙舞蓮花旋駝酥斜注荷筒碧玉鐺醉濕紅氍毹  
寶篆香遲明晰晰到來不數桃源翁世人那得如君同  
坐忘日月纏龜息笑指乾坤入鳥籠

送萬鎮峯先生致政歸豫章

分水雲深轉翠微，春山花氣襲征衣。  
曙傳雉堞鴉初散，月滿關河鳥倦飛。  
千里孤帆雙睫外，百年吾道寸心違。  
斗懸獨倚南樓暮，雪後疑驚舊講幃。

送顧友蒲主簿報政

栖鳳池邊六萼梅，青尊長伴醉初開。  
箏彈吳調秋風壯，歌倚胡床山月來。  
九曲野棠明建水，五雲宮柳望燕臺。  
上林春色鶯聲蚤，何日重尋花下盃。

壽藍母 二首

護種南山下青青玉露中舞衣春酒熟捲幔彩雲通短  
髮垂堂白寒燈伴女紅周南千載上應想葛覃風  
嘉氣鬱氛氲瑶池日未曛芝擎香潤重蘭長碧生文鶴  
髮年年醉熊丸夜夜分紫泥封半濕擬下九天雲

輓梅牕董隱翁

當年和靖梅千樹野色林光自草廬香雨春深驚夢濕  
一牕踈影滿床書

簡范明河

門外青青楊柳垂故人車馬久無期  
獨憐秋雨愁黃葉  
欲向春山拾紫芝聖世風流多不賤  
野情踈闊少相宜  
東林月色曾看竹僧舍清光今對誰

病中寄藍吾原

微軀草莽慚清世多病茅茨讀古方  
長釣短蓑知自分  
丹山碧水夢何長孤懷鶯老春深後  
獨坐林虛夜未央  
聞說有詩元起病可能新句到胡床

病中寄藍湛齋求甘菊

病入宜甘菊欄荒種藥苗傍花曾酌酒采玉泛明甌三  
徑齋前夢羣芳雨後秋故叢如未發留得落英不

送友人遊太學

二首

恒嶽開燕薊長江入楚吳西風青雀舫北極紫雲衢勲  
業須王道詩書賤腐儒積分應勉勉重別敢區區

十載論心友相看獨有君離情憐夜雨意氣滿秋雲烏  
道衝寒翠龍泉結綠文芹香分璧水采采碧芳芬

贈別

馬首一杯酒寸心難重陳君看白雲去處處青山春丈  
夫貴出處不媿千秋人青蠅點濁污白璧同珉珉我生  
亦偃蹇感此良悲辛空有卞和淚賴知原憲貧志士各  
有心其能卸物嗔古人亦有此勉德相為隣行行何贈  
之送送臨江濱幽蘭為君采長佩為君紉願結腰帶間  
長隨君子身

李子將出關夜坐言別

涼風夜排戶秋意變林木十載得君聲相逢但秉燭顧  
影毛髮踈悲愴填心畜低昂看北斗流光不可續君為  
天際鴻我比林端鷗雙龍鳴故函四海志拳曲感子正  
徬徨相將治裝束

白苧詞

白苧初成三月時機中少婦悲別離欲裁白苧作郎衣  
想像郎身宜不宜尺上尺下心轉苦抱向姑前問裁處  
姑云筭裏有舊裳好將刀尺尋規矩引鍼解線結不開

添得愁心亂如縷  
默默燈前理素紗  
起頭忽見燈結花  
擬是郎歸喜不定  
翻鍼刺手指頭麻  
顛來倒去縫不成  
隣家戛戛鷄爭鳴  
平明開門得郎信  
郎在交河萬里城

聞鵲詞

自郎行役今三年  
朝朝抱香拜堂前  
忽聞飛鵲噪簷角  
愁心解却思郎面  
殷勤默向鵲聲祝  
郎歸更願聲三續  
遲回四望不肯鳴  
深怕鵲聲飛過屋  
鵲聲轉遲心轉急  
欲近簷前聽端的  
舉身復坐不敢行  
恐驚噪鵲先飛起



嗟嗟向人如有情  
歡喜為郎掃簷聽  
但得郎歸不怨遲  
低拜神鵲開雙眉  
雕籠知鵲不願宿  
從此日遺簷下粟

塞下曲

雪暗陰山夜  
馳捷簫鼓中宵鳴  
不歇雲合連天塞  
草黃風吹滿地胡笳月

江南曲

記得郎行相送時  
江頭流水去無期  
早知郎去如流水  
願作扶桑海上枝

九日登白華巖同張南虛彭石堂范涪州

石磴交迷紅葉亂牧童遙指碧花叢坐侵斜菊初經雨  
巾掛長松不受風萬井平依青嶂落一峯寒入翠雲重  
登臨不盡茱萸醉漫引青藜東復東

過范子果園金橘垂熟得皮字

羣實成功早能霜故自遲紅垂星失彩圓落鳥添疑倚  
翠偏宜葉傳香轉薦皮荔丹塵騎急莫遣貴人知

進酒篇酬董氏諸弟

欲雪欲雪萬峯蕭索鳥棲不飛同雲四合長風萬里掃  
天關玉塵滾滾空中落山寒高卧正蒙頭扣門報君動  
芳酌感君動芳酌為君發長歌仗劍對君起進酒不辭  
多古來劉李稱達飲風流千載誰滅磨瓊樓玉宇不足  
貴素芝商巖今如何淮陰臺上月金谷園中莎上蔡悲  
蒼準鴟夷弄清波達人志士只如此機心何必傷天和  
古人事真率今人艷綺羅有酒不肯飲白日成蹉跎君  
不見蒼梧之野箕山之阿芳名俱緬邈高塚對嵯峨

贈林東崖畫師

東崖野人結茅屋一道清溪數竿竹山月江雲邀上樓  
細草幽花迎徑躅丹青獨擅當時名醉落長毫應有神  
淡煙疎樹成村晚花落鳥啼深谷春白晝能呼月六月  
慘飛雪手中造化如弄丸仰空大笑天地拙嗟爾名家  
世所聞鄭虔韋偃皆凡羣平生攻意不攻象筆陣直破  
曹將軍

簡任小溪傷足卧山中復聞失偶

不見任安重九秋看雲長望小溪頭  
盆聲猶寄莊生思  
野興誰同郭泰舟  
草徑足音空谷斷  
竹床夢轉下堂憂  
少陵詩句能消病  
老態踈狂試漫謳

偶成

酌酒月為伴  
開門山近人  
白雲湛江色  
碧草弄湖春

山中集卷四

欽定四庫全書

山中集卷五

明 邱雲霄 撰

賦類

適賦

華峰子時之逸民也清標高格碧髯彤顏或者謂其有  
絕俗之風倫出塵之骨幹也嘗考槃于白華之陽喜呻  
吟乎南華之章眇屐恭髦房杖然韁時逍遙乎華峰之

麓或登賞乎華峰之岡興至獨往物我以忘矢心永樂  
結盟相諒乃自號曰華峰子也室堂之偏卷阿孔暘拓  
名囿布羣芳結孤臺跨長岡靈筠百尺夏木千章葳蕤  
紆鬱煥煥葱蒼奇花錯陳怪石相交枝構虬驚葉團掌  
張萼浴日以移妍鳥命風而流唱當是時也主人出坐  
客至呼簋言纚纚其不窮志飄飄而孤舉紉蘭佩之陸  
離製荷衣而容與修洵雅潔禔禔俛揭軒幌而雲流  
擁茨亭而山出引清奏而魚游抗高音而鬼哭柔風爽



腋蹴踡回而室僚丸明霜滌場弓矢調而愁羿日退則  
時舞袖臨堦或過庭問禮是以和心神固膂力不事乎  
虎顧熊經而自胎其鶴齡龜息止山子嘆曰善哉華峰  
子之適也客有進而言曰若知其致是也乎其上馬以  
后坂翁之為父繩武而光貽燕以祉下焉以新泉甫之  
為子琬琰待沽瑰琦映席惟夫作之有人述之有繼是  
以謝鞅掌於裘營獲悠揚于廣適也止山子曰然哉夫  
人並生天地之間物我相形得失交著不能不啟牖於

謀圖而懷機於知慮也是故私竇通而衆欲投嗜端然而饕門燥眈眈虎眈僕僕形勞故惟無畔援於歆羨乃樂吾生之閑休盍觀諸物乎雕籠熟栗非冥飛之所願屬綵縈鏤膺非林走之所托性無他求其適耳是故至人漠富貴於浮雲脩乾坤於逆旅方其適也將不知寥廓之為容會運之為久沈藏之為無貌色之為有絜日月於弄丸幼萬物於芻狗謝法制之牢籠齊羈系於斷韁是以軒服不足為之安鍾鼎不足為之飽譽流不足

為之芳黼黻不足為之繡真葆玄元彭聃先後陶朱執  
鞭王謝引驟雖萬乘不得以臣隣况五陵而可以執而  
友耶客曰曠哉子之言也至人之適華峰子其或幾乎  
止山子曰吾將言其適也未言其至也精明所之出閤  
入知望境投趨登堂造室

逸士賦

有序

晉上清節吾於隱逸傳得五柳先生一人耳觀其詩原  
之性情暢之天真而冲淡之味瀟散之姿孤高之節有

如寒泉出石青蘭伴谷獨鶴翔雲疎桐倚月每嘆飽清  
風於百世而恨不得相與論志於一時也時客有携五  
柳圖請言為柳塘翁壽者邱子曰吾之慕陶久矣吾不  
得靖節而見之得見有似於靖節者吾愛焉吾不得似  
靖節者而見之得聞有似於靖節者吾愛焉夫自周道  
衰而士棄德世皆朶頤腥鼎附體犧文以夸饜耀間有  
懷異以矯趨者亦惟取終南為捷徑耳柳塘翁信能澹  
然無欲與世相遺而少似於吾靖節吾當為其賦之賦

曰繫天地其逆旅矣日月吾之軺輪惟造化爍爐錘於  
神巧兮迭詘信為之始終羌萬彙胞貫於垓北兮夸蜉  
蝣之寄蹤惟達人之洞岷岷而趨悟兮無畔援以歆乎  
華榮顰腐鼠競鳶鳥之吻啄兮將裴徊擘輝而奮翥於  
岡桐葆吾真於貞一以不解兮俟修短而順享乎旻穹  
開三徑以成趣兮來五柳之清風依稀乎吾陶翁之不  
汨兮卧北窓之羲農祝子之壽考兮樂斯志于無窮行  
將考槃于子所兮與子弄九於天宗

昇平賦


夫自桃谷迷津遺恨武陵漁父芝山允道流聲商洛  
基翁遂令後世耽情肥遯薦志陸沉者莫不屬心高潔景  
止芳馨焉然予嘗讀高士傳及桃花源記未嘗不憮然  
罷卷慨其所遭方嬴氏之亂天紀顧民生之如露晞號  
嚴迅震法密凝脂當是時也搖首犯禁重足懷疑是故  
知者逃名達人遠跡奮鴻舉而甘豕遊避危機而謝繒  
及恐恐馬入山不深投林不密則其所以種朱桃啖青

芝放身長往與世相遺者乃其不得已也而又何樂乎  
締觀其歌夷考其事則慨唐虞之世遠托深谷之逶迤  
懷富貴之憂大甘芝草以療饑率妻孥於絕境樂草木  
之無知世秦服而昧漢沉魏晉之推移則其情可悲而  
志固可識也肆今吾人忘日月以優游順陰陽而消息  
夏葛冬裘倦眠饑食羸稚相保上下各適儔籩豆翕兄  
弟靜琴御衍家室時賓四隣或來三益俯仰寰區讎論  
今昔感菟絲于女蘿固纏綿而交結屢城廓以憇幽林

登隴邱而掃紅葉死徙同鄉桑麻連業樂彼逍遙順其  
生滅夫所以獲此者豈無自哉當我皇明啟運萬姓攸  
濟列聖建中四方來極文承武開漸仁摩義所以垂今  
百有八十餘年重熙累洽林鳳郊麟烽寒斥堠兵寢潢  
池民稼而饗婦桑而衣是以天下皞皞四海祁祁爰擊  
壤於康衢忘鼓腹於帝力而曾莫知其故也昔者武成  
奏功歸馬牛而士女來綏宣王復古歌鴻雁而流離安  
宅夫當傾否亨屯之餘乃遂其室家胥慶之願則吾人



丁久安長治之世而保其休養生息之樂者其相去亦已遠矣況於草昧而引去者邪使後世有桃源翁芝山老未必不自嘆惋而追賞吾人之遭幸也誕今享有諸樂咸不自知因感而賦昇平焉



山中集卷五